

sic divinæ laudis officiis, ritibus, ac Cæremoniis debent esse intenti, ut celestes veluti milites, instructas Cæli acies imitentur, & Angelorum choros, in quibus Dei Verbum sequentibus, nil confusum apparet, vel inconcinnum. Quod quidem si à nobis detrectetur, verendum profectò, ne à præscriptis sacrorum rituum documentis resilientes, à cælesti tandem, ac pura, qua beari expectamus, divinarum mentium harmonia, ut sublimiori Angelo contigit, prolabemur. Lucifer namque cum, ubi, decies centena millia, Deum laudantes, assistunt, non stare, ut cæteri, sed impudentissimè sedere, sociamquè Dei laudationem Cæremoniarum neglectu despiciere præsumpsisset, audire meruit. *Quomodo cecidisti de Cælo Lucifer? Veruntamen in infernum detraheris in profundum lacu.* Hanc avertere à militibus suis irreparabilem jacturam fatagentes Ecclesiæ Duces, leges ac regulas quamplures pro divinis officiis ritè, ac Cæremonialiter persolvendis sanxerunt, inter quos B. P. noster Franciscus, qui librum undequamque, tum quò ad Missam, tum quò ad horas Canonicas, tum etiam quò ad cætera ad divinum cultum spectantia perfectum composuit, & ultrò in Regula præcepit, nos ritibus Romanæ Ecclesiæ conformari, ac reverenter, & cæremonialiter divinum persolvere officium. Ut igitur in nostra Religione una rituum Ecclesiasticorum observatio nos unitos reddat, ac uniformes, veros Cælestis curiæ imitatores, & Divino Legislatori, ac Parenti obsequentissimos filios, nec non meriti non exigui compotes efficiat: devotissimo Thoma a Kempis in exercit. Spirit. cap. 5. num. 3. dicente. *Nam cuncta, idest inclinationes, prostrationes, & alias bonas consuetudines, si debite agamur, ad meritum non exiguum computantur: Cæremoniale hoc in lucem prodit, jussu Reverendissimi P. d'Avila vigilantissimi nostri Præsulis, cujus potissimum propositum est in reformandis moribus, atque Ecclesiasticis ritibus ad debitam formam instaurandis. Opus sanè cuncta prorsus complectens, quæ ad univasas functiones tum Religionis proprias, tum ceteris communes, desiderari noscuntur; cujus methodus adeo facilis, & clara est, ut neque declaratione, neque confirmatione egeat. Nonnulla tamen, quæ necessario præmittenda sunt, breviter parte prima exponemus.*

Advertant autem omnes Lectores, quod, quia nihil, non Romanæ Ecclesiæ ritui conforme, in hoc opere insertum est, tale evasit, ut (paucis, quæ ad Ordinem specialiter attinent, exceptis) omnibus, ejusdem Rom. Ecclesiæ ritibus utentibus, commodè valeat inservire.

